

## NAMA KATTA ARO MONDOLI

### *Sabbath Attam-September 16*

**Ia Antini Lessonna Poraiani:** *Gal. 6:1–10, Mati 18:15–17, 1 Kor. 10:12, Rom. 15:1, Johan 13:34, Luk 22:3.*

**Mingani Pod:** “Uni gimin, sal man·mitingon, an·ching pilaknan, dintangmancha bebera·ani ma·drangna, namako dakna hai” (*Galatirangna 6:10*).

**M**itam game cha·giparang antangtangna dal·dalbata me·surangko (*jekai, alu, rasin, narikel,*) cha·na jakkale chonchona (*bitchil/biterangkosa*) ge·nade jakkalaha. Rakari sokon uamang dukko man·aha; maina uamangni ge·e game man·ani biterangara *marblerang* gita chonchonaona sokaha. Ia ong·a obostachi, ua game cha·giparang janggi tanganina gamchatgipa skie ra·aniko man·aha.

“Uamang antangtangni janggi tanganina namnambatarangko man·na amjaha maina agitchaakosa bitchilnade jakkalaha. Janggini niamni bichalde manderang maidakako ge·a gama uandakgipan sokpillagen.

“Minggipin dake chanchiatode, chonchona me·su bitchilrangko ge·na jakkalaniara uan dakronggimal ong·a. An·chinga dal·dalakode antangtangna ra·e, chonchona ba agitchaarangkosa ge·nade jakkala. An·chingara mitam gisikni niamrangko antangtang jeko dakna ska uko dakao man·na ka·donga, ba antangtangnasan jekoba man·na chanchiaigipa ong·a; indiba an·chinga indakgipa ong·genchimoba an·chingnara antangnasan chanchiaigijagipaonikosa boksisko on·skagen.”—*International Student Fellowship Newsletter*, March 2007.

Paul ia niamkon Galati 6:1–10 o jakkala. Memberrang “saksa sakgipinko chikgrik-cha-grik dakani pal” (*Gal. 5:15*), mondoliara jeonan Gisik an·chingko dila uandakgipaonasa re·na nanga. An·chingara ka·sachakachisa jokatako man·ako uie, an·chingko sontolgipa aro chakchikbatgipa aro gipinrangna maidake ka·sachake dakgipa ong·na nanga uandakgipaonasa ong·atna nanga.

*\*Ia antini lessonko Sabbath sal September 23 na name poraie taribo.*

**Robibar**

**September 17**

## **GA·AKGIMINRANGKO NAMATPILTAIANI**

Kristian janggi tanganio chugipa ka·dongsoanirangko Paul man·na ka·dongengon, (*Gal. 5:16*), bebera·giparangna uni Galati 6:1 o ku·patianiba ku·chimitappile tobegipa ong·a. Manderangara chu·soksranggipa ong·ja, aro antantangko namen on·kanggipa Kristianrangmangba gualaniko dakgija ong·ja. Greeko, Paulni Galati 5:16 o kattarangara basakoban somoio mondolio maia ong·nakenga ua obostarango niksoenganiko mesoka. Indakgipa obostarang mondolio ong·ahaon uko maikai kam ka·na nanga uani gimin Paul Galatirangna nambegipa ku·patianiko on·a.

**Bebera·rimskarangoni saoba maiba papni cholono ga·akahaon Kristianrangara maikai kam ka·na nanga? *Gal. 6:1, Mati 18:15–17.***

Galati 6:1 o Paulni ku·patiani namgniara, Paulni gisiko maiba tik obosta ong·chongmotani donganiko an·ching uina nanga. Ian skanggipa sentenceni adhao minggni kattarang re·wilwila. Skanggipa kattara *caught* ba *overtaken* ong·a. Uni ortoara “rim·a man·na, chadraba ba rim·a, ba aiao inmana” ine ong·a. Iano kattarangni adita dingtanggrikaniara Paul uni gisiko

minggni mikkangrang donga ine chanchianiko nakatata. Ian je bebera·gipaan gipin bebera·gipako uni maiba namgijako dakao “rim·a” uamangmangna aganja indiba ua kamna ua antangko uni mingsa cholonchi “chadrapaha ba rim·aha” ine nikatnasa, (*Toe Skiani. 5:22 ko nibo*) jedakode, ua indakgipa obostarango gelna basee ra·na man·gen.

Maiba ong·gija dakani gimin Paulni agan·chanchigrikenggipara mangsongchongmote dakanide ong·jachim ine uni agananionikon uia. “Dakguala” ba “pap” katta Greek katta *paraptomaoni* re·baa, iara mongsongchongmote pap ka·aniko aganja indiba gualani, ja·gitotani, ba ong·gija ga·tuanganisa ong·a. Ua ja·mangipa, skango Paulni Gisikchi “re·ruraani” ine agangipani gimin dingtangmancha uianiko on·a. Ian mandeni gualanina pa·sikani ong·jaoba, Paulara bamgijagipa, bobil dakpilgipa papni giminde aganjaenga ine iano rongtalbea (*1 Kor. 5:1–5*).

Indakgipa obostarango nambatgipa kam ka·anide sasti on·ani, jegalani, ba a·pal galani ong·ja indiba namatpiltaijanisa. Greek kattao pe·gipa “namatpiltaijani” ara *katartizo* ong·a aro uni ortoara “taripiltaina” ba “tik dake donani” ine ong·a. Niam Gitalo iako na·tok jalrangko “tarianina” jakkala (*Mati 4:21*). Greek sea·jotanio, medical termo iako be·gimin grengko tik ka·taijani/namatpilanina jakkala. Apsandake, an·chingni bebera·rimska ga·ake ja·a be·gipako an·chingba galchipna nangja. An·chingni Isolni songnokona damsani re·anio, an·chingni Kristoo jonggipa aro nogiparang ja·gitote ga·akgen, uamangna an·chinga Kristoni bimango memberrang ong·e simsakbena nanga.

**Mati 18:15–17 ko ja·rikani pal, an·chingara mainasa an·chingni ka·onanggipa mandeko namjabee aganrongbata, an·chingni ka·onanga ua mandeni kosako ding·roroa, aro indake a·jak soknamangba mangsonga?**

## DAKMAJOANI GIMIN SIMSAKBEBO

“Aro Nathan Daudna aganaha, Ua mande na·an” (2 Sam. 12:7).

Galati 6:1 o Paulni bilongbee agangipa kattarangara, an·chingni janggi tanganirangko name nitimchina aganani ong·a ong·jaode an·chingba dakmajoao ban cha·ako man·gen. Ia mikrakataniko nikchanggualna nangja. Paulni ku·patianiko ta·rake dakna nanganiko uni molmolaoniko nikna man·a. “Chanchia” ba “simsaka” ine pe·gipani ortoara “name nina” ba “gisik on·bee knatimna” ine ong·a (*Rom. 16:17, ko Phil. 2:4 baksa tosusabo*). Uni gimin, Paulara maikomancha aganenga uara, “na·a antangko name nibo” iasa ong·a; ong·jaode pap nang·koba rim·a man·gen. Ian mondolio donggipa sakanti sakprakna mikrakatna aganani ong·a.

Maidakgipa dakmajoanikomancha ua Galatirangna agana ua tikkode Paul aganja. Haida ua dingtangmancha papko ma·teke aganna uni gisiko dongjaegnaba donga indiba je papba ong·china, ua apsan papko jekon sakgipinni ga·akako namatna kam ka·engachim ua apsan papkon dakmanjachina mikrakatani ong·a. Apsan somoion, uni Galati 5:26 o agangipa kattarangara uamang jemangni kosako kam ka·engon uamanga uamangna bate gisiko nambatgipa manderang ong·a ine rasong chajachina mikrakata.

**Maina gisikni gaora dakani giminba Paulara mikrakataniko on·na nangnikaha?** *1 Kor. 10:12, Mati 26:34, 2 Sam. 12:1–7 rangko chanchibo.*

Mingsa Kristianni re·ruraa o dal·batsranggipa kengniara gisikni gaora dakanian ong·a. Basakobade an·chingara manderangni dakenggipa maibadagipa paprangko dakmanjawa

ine antangtangko chanchia. Indiba an·chingra pilakan apsan papni cholonni ning·o ong·a—cholon jean Isoloni bikpil ong·a. Isolni Gisikni bilchi ra·rikani gride, an·ching je paponaba dakmajoao ga·akna man·a. Kristoni a·palonide, antangtangko toromi ong·nikaiachide paponi jokna man·ja: indakgipa simsaksoaniko an·ching nanga. Indake gipinrangni papo ga·akon an·chingara dal·bee duk man·chakna nanga.

**Badita chang na·a antangko gipinrangni kosako uamangni pap dakanina matnanganirangko (gisiktango ong·aiengnaba donga) dakmanaha, je, na·a antangba salsaode, doso ong·gipa ong·achim?**

*Mongolbar*

*September 19*

**DUKKO CHAKRIMANI** (*Gal. 6:2–5*)

**Ga·akgiminrangko namatpilan baksanaba, mai gipin skianirangko Paulara Galatini bebera·giparangna on·a?** (*Gal. 6:2–5; Rom. 15:1, Mati 7:12 koba nibo*).

Galati 6:5 o “bal boja” ine pe·gipara Greek kattao *baros* ong·a. Uan jrimbegipa bojako sanaba songreao chile ra·na nanganiko miksonga. Salrang re·angan baksa, uan jedakgipa duk ba neng·nikanina, jekai salgimiko sal ding·preatao kam ka·a, uni bal bojani chinsan ong·aiaha (*Mati 20:12*). Paulni “saksa sakgipinni bal bojako chilrimbo” ine inaniara uni gisiko gisikni ningtuanirang namen apalbee donga jekon Kristian janggi tangao nikchanggungalna nangja.

Skanggipao, Timothy Georgeni seani gita, “Pilak Kristanrangan bal-bojarang donga. An·chingni bal-bojarangara dal·anio, bimango, rokomo, Isolni an·chingni janggi tanganirango donsogiminrango pangchake dingtang dingtang ong·naba donga. Iara mitamrangnade dakmajoani bal-boja aro uni bitede cholon tang·onani ong·a, iano pod 1 o sea gita.

Gipinrangnara be·enni saani, ba gisikni tik ong·gijani, ba nokdang be·gruani, ba kam ka·na man·gijani (*lack of employment*), ba namgija gisikchi sinjetani, ba bang·a dintang dintangrang; aroarang Kristianba bal·bojarangoni joke katna amja.”—*Galatians*, p. 413.

Gnigipao, Isolara an·chingkora pilak bal·bojarangko saksan chilaniko nangnikja. Rasonggribee, an·chingara antangtangni bal·bojarangko gipinchi chilchakna on·na skana batede gipinrangni bal·bojarangko chilchakna sikbatenggiparang ong·a. Indakgipa cholon·bewalko, antangtango chu·ongnikaniko Paul jegala (*Gal. 6:3*) maina ian mandeni gaora dakani ong·a, antango nangani gnangko aro antangni bilgrianiko ku·rachakna jechakani ong·a. Indakgipa gaora de·ani, gipinrangna Isol mai nama kamrangko ka·na on·ahachim uarangko kam ka·na (*gipinrangna/uamangna*) champenganiba ong·a.

Bon·kame, Isol an·chingko gipinrangni bal·bojako chilrimchina ge·eta maina mondoliara Kristoni be·en ong·a, aro indake an·chingni jakrang gitasa gipinrangna Isoloni ka·dimeako on·a. Ia toe agananina Paulni kattarang donga, “Indiba ongiparangko ka·dimeatgipa Isol Titusni re·baachi chingko ka·dimeataha” (*2 Kor. 7:6*). Nibo, “Paul antangni nanganina Isolo namen bi·aha indiba Isol Uni ka·dimeako una on·jaha. Isoloni una ka·dimeanirangara uni ripengrang gitasa aro uamang mai namgipa koborarangko una ra·baaha uchisa ong·aha.

“Mandeni ripeng ong·ani, jeon an·ching saksa sakgipinni bal·bojarangko chilrima, iara Isolni Uni manderangna miksongani ong·a.”—John R. W. Stott, *The Message of Galatians*, p. 158.

**Maia nang·ko gaora dakaoniko, kratcha·aoniko, ka·dongna man·gijaoniko, chu·ongnikgijaoniko dakchakaniko am·na salrikenga? Nanga ong·ode, saonikoba jeon na·a ka·dongchakna man·a, uo nangni dukrangko سوالنا maina bi·ja?**

**KRISTONI NIAM** (*Gal. 6:2–5*)

**Dukrangko chilrimaniara Kristoni niamko chu-sokatengani ong-a ine Paul agana. “Kristoni niam” ine uni agananiara maiko miksonga? Gal. 5:14, 6:2, Johan 13:34, Mati 22:34–40.**

Paulni ia katta dol “Kristoni niam” (*ton nomon tou Christou*) ko ugita apsananggipa 1 Kor. 9:21 (*ennomos Christou*) ona agre darang Sastroni ki-tapoba jakkala dongja. Ua katta dolni dingtangmanchateaniara iako dingtang dingtang pe-anirangona ong-katataha. Saobarang gual gual ian Isolni niam Sinai A-brio on-gipara minggipin niamchi bodolako man-aha aro uan “Kristoni niam” ong-a ine jeraa ra-a. Gipinrang ua katta *niamara* ramram “niamrang”sa ong-aia ine aganskaa (*Rom. 7:21 ko nibo*), ortode, gipinrangni bojako chilanichi an-chingara Kristoni dake mesokaniko ja-rikenga. Paul meja uni skanggipa chition Kristoni re-baanichi ge-eta mingchikkungko gimaatjaha ine mesokaha. Gimaatan palde, ge-eta mingchikkungara Kristian janggi tangao nangchongmotgipa kamko ka-na gita ka-saachisa mesokaha. Ian Jisuni a-gilsako kamko ka-mitingo uni skiao aroba Uni janggi tanga gimiko aro Uni siaonamangba kam ka-ani gimin kan-dike indiba man-gope mesokani ong-a. Gipinrangni bojako chilaniara, Jisuni ja-kuosan an-chingara ja-rikaienggipa ong-ja, an-chingara niamko chu-sokatgiparangba ong-enga. Gipin golmalba ia podrango nabaa, Galati 6:2 aro 6:5 ni gisepo nikrangra meligrikgijaniko. Ia golmal, maibakaiba, jensalo Paulara minggni obostarango minggni kattarangchi talatna jakkalenganiko saksa uiaha, unon altuaen namatako man-aha. An-chingni nikmanbaaha gita, pod 2 o bojana jakkalgipa kattara (*baros*) ong-a, uan chel-aona chile ra-na nanggipa jringipa bojako mesoka. Pod 5 o *phortion* katta,

jahasni mal bosturang, sipaini janggilo kegipa bagrang, ba ma·ani oko keenggipa bi·sakomangba mesoka. Ua skanggipa bojako a·samchi donna man·oba, ua ja·mangipakode man·ja. Oko keenggipa ma·gipa an·tang degipako ra·bitna nanga. Ia mesokanio gita, mitam bojarangna gipinrang dakchakna man·a indiba mitamrangnade man·ja jekai dos ong·anina boja ong·engani, saknaani, aro siani. Iarangna, an·chingara Isolosanmangmang pangchakna nanga (*Mati 11:28–30*).

**Mitam bal bojarangna na·a gipin manderangoniko dakchakaniko man·engon, mitamrangkode Isolonasan mangmang ra·angna nanga. Je bojarangkon na·a chakna amja amja daka uandagiparangko Gitelna on·na na·ara maikai skie ra·na man·gen?**

*Bristibar*

*September 21*

**SATANI ARO RAANI** (*Gal. 6:6–10*)

Galati 6:7 o, “kal·steka” ine pe·gipara (*mukterizo*) ong·a aro uan Niam Gitchamni Greek pe·anirango nakatsimsimbaoba, Niam Gitalode ianosan mangmang nakata. Uni ortobaibai pe·aiode “gingtingko chuate, il·leng il·leng dakate namgijaniko mesoka” ine ong·a. Niam Gitchamo ian Isolni katchinikgiparangko chonnikaniko mesoka (*2 Serikani 36:16, Jer. 20:7*), aro iako changsao Isolni kosako bobil dake chakatani gimin talatna jakkalaha (*Ezek. 8:17*).

Paulni miksongania indake ong·a je manderang Isolko knachakgija daknaba donga ba Uni ge·etanirangna manigija ong·namangba donga, indiba uamang Isolko a·palchi donna man·ja. Uan chon·kamao bichal ka·gipa ong·a, aro bon·kamaode uamangara uamangni kamrangna damrangko gamna nanggen.

**Galati 6:8 ko poraibo. Iano Paul maiko mangsongenga? Mai exemplarangko na·a Sastrooniko be·enni skarangko aro**



## **Gisikni skarangko satani cholonrangko nikna man'a?**

(*Examplerangna gita iarangko nibo: Wat. 5:1–5, Luk 22:3, Dan. 1:8, Mati 4:1.*)

Sata aro raani gimin Paulni toe aganani mingsamangmangna ong·aija. Ian bang·a chengoni toe skiani agananirango janggini chu·gimik uiatani nabaani ong·a. Maia gamchatani ong·a, uara Paul uni skango be·en aro Gisikni gimin agananirango maikai uko mesokna jakkala uasa ong·a. James D. G. Dunn sea, “Da·oro an·ching jekoba basee ra·na jakgitel ong·a, indiba uni biterangkode basee ra·na jakgitel ong·ja.”—*Galatians*, p. 330.

Ia a·gilsako Isol an·chingni paprangni biterangoniko jokatjaoba, an·chinga an·chingni namgijako basee ra·ahanina ka·bena nangja. Isol an·chingko an·chingni paprangko kema ka·ahanina aro an·chingko Uni dedrangrang ong·na deragatahanina katchana man·a. An·ching an·chingo da·o chol man·anirangko ma·pangko rikna nanga, uarangan salgini raaniko raanina bite nangatna gita tangka bota gita ong·gen.

Galati 6:10, ia miksonganiko ia toe agananchi talata: “Kristianni cholonrang minggni niani donga: mingsara a·gilsak gimikni ra·chakna man·aigipa, aro minggipinara dingtangmanchagipa badiabanasa, ‘mongsongbate jemangan bebera·giparangni nokdangni manderang ong·a.’ ‘Uni gimin an·chinga pilak mandenan namako dakna hai; Paulni a·gilsak gimikko molmolania pilak manderangan Isolni bimango ong·atako man·aha aro indake Uni nikanio tona ampilgija gamchatgiparang ong·a. Jensalo Kristianrang ia Sastroni parape·ani ong·a chongmotko (*datum*) gualaha, uamang gelna man·gijagipa jatni susaani, cholon namgijani, tribal·caste mitchigrikani, gadang bak ka·ani, aro hajal gipin ma·sigija kamo agre gisik nangani (*mongsong toromo*), Adam aro Hobaoni da·alonakingking mandeni communityko matatgipa ong·aona soka.”—Timothy George, *Galatians*, pp. 427, 428.

**Na·a maiko satenga, namakoma namgijako. Na·a antangko niate nibo. Maidakgipa raaniko na·ara ranakenga?**

*Sukrobar*

*September 22*

**CHANCHIDAPANI:** “Isolni Gisik namgijanirangko dakjana an·chingni gisikni uanio kam ka·a. Jensalo mande antangko Gisikni bilni kosako chuata, ua namgijani raaniko raa. Indakgipa katta ra·gijani bitchilrangko satgipa mandeo Gisikara uo kam ka·aoni komiangrroa. Uni kosako mikrakataniko on·anirang komiangrroa. Ua ka·sne ka·sne Isolna kenani gimaanga. Ua be·enna sata; ua namgijani raaniko ragen. Antangni rakarina uni satani minangengjok. Ua Isolni rongtalgipa ge·etanirangko namnikja. Uni be·enni ka·tongara ro·ongni ka·tong ong·baskaa. Namgijako dake, ua bebeko kimkime jechaka. Ian mandeni namgijako, niam grianiko, dosiko, aro mata·pari ong·aniko chengoni a·gilsako man·ani gimin ong·a.

“Maichi janggiko nosto ka·a uani gimin pilakan seng·na nanga. Mamung bichal ka·ani gri mandeona Isol watatja. Ua mandeko gisikni kana ong·e dakjaha. Bebe aro tol·ani dingtanggrikaniko uina man·en Isol chu·onga gita seng·aniko on·aha. Indiba Ua darangkoba bebeko ra·chakchina draja. Ua uko namako aro namgijako basena jakgitel wataha. Namako dakna una chu·onga dilaniko on·aniko ua jechakode aro namgijanikosa basee ra·ode, ua iako gnigipa changode ka·sokbaten dakgen. Gittamgipa changode ua altuabaten uko dakaigrok aro Satanni bakchisa chadengna basee ra·aignok. Aro ua indake namgijao kimkime dakangon, aro tol·ako bebera·aignok aro unon dongtoaignok. Uni jechakanian, uni biteko rana nangataha. (MS 126, 1901).”—Ellen G. White Comments, *The SDA Bible Commentary*, vol. 6, p. 1112.

## CHANCHIGRIKNA SING·ANIRANG:

1. Papo ga·akgipa bebera·gipako “namatpilaona ra·baa” ingipara maikomancha miksonga? Namatpilaniara pilakan skang gitan apsan ong·epilgen ine miksongani ong·ama? Chanchigrikbo.

2. Mitam bal bojarangkode manderanga paltangtangan chilna nanga (*Gal. 6:5*), indide bebera·gipara, ua sakoba dakchakna miksongenga ong·ode maikai miksonganiko daka?

3. Nangni mondoliara Paulni Galati 6 o skianirangkoara maikai chanchia? Na·a antangara mai dingtanganiko dakna man·gen?

-----  
*Inside the Stories*

*13 Gipa Sabbath*

### JORA RIPENCKO SALGIO DAKA—BAK 3

“Uani gimin na·a rake bi·na nanggen,” Marina aganaha. “Iade bilonggipa obostasaba.” Unikode Marina minggipin agananiko agandapaha. “Haida anga nangni ma·a-paana Adventist panteko am·e on·na dakchakna man·naba donga. Anga adita manderangko u·ia.”

“Na·a u·ibebeama?” Sahana sing·aha. “Uan aiao, nambegenchim.”

Sahana antang ma·gipana antangni jajrenganirangko aganaha. “Ai, anga Adventist mandekosa bia ka·na ska.”

“Ia pilak dingtang dingtang mondoliranga apsan on·tokaia,” uni ma·gipa una aganaha. “Aro anga darang Adventist mandekoba u·ija.”

“Angni ripeng Marina, angna Adventist mandeko segipa am·na nang·na dakchakna man·gen ine aganenga,” Sahana aganaha.

“Atcha, indide nina. Marina uni gisiko sakoba nika dongengode, chinga uko chanchichongmotgen,” uni ma-gipa aganchakaha.

Pastor Michael bakan bia ka-gnok ine Marina u-iachim. Ua bang-a Adventist chadamberang uni bia ka-ona re-batokgen ine u-ia. Aroba Marina iakoba indake uiaha; chongmotan, Aby, saksa pante adita chel-kaloni re-baenga aro uara Marina aro uni nokdangon dongegenchim. Ua Sahanako ia panteko grongechina, antangni nokona okamataha.

Una namgipa Adventist panteko am-anio dakchakchina gita Sahana gisiko nangbeen Isolo bi-aha. Aro uni bi-anirangko Isol knachakaha ine ua bebera-aha. Gisik Rongtalgipa una ka-donganiko on-aha.

Ua Adventist pante sokbaahaon, Sahana namen kusi ong-aha; maina ua panteara gun gnanggipa aro chaba chananggipa ong-achim. Aro uara *Software Engineer* ong-a ineba ua u-iaha. Iamang sakgni Marinani noko adita kontarangna agangrikaha. Sahanani ma-a-paaba Abyko grongeeha, aro una namen gisiko nangbeaha.

Pastorni bia ka-ani ja-mano, Aby noktangchi re-angpilaha, aro Sahana una mamungkoba aganattaijaha. Salgnini ja-mano Abyni ma-gipa Sahanani photoko bi-ataha. Jagnini ja-mano Abyni ma-a-paarang Sahana aro uni ma-a-paarangko grongeeha. Agan-chanchigrikanirang namen re-angaha. Jensalo Abyni ma-a-paa nokona re-pilangahaon, uni ma-gipa depantena aganaha, “Ua me-chik silbea, uko anga nang na basee on-na ska.”

Bia ka-anina kamrangko a-bachengaha. Jensalo Sahanani skul ka-ani *contract* ra-a matchotahaon, ua Abyni pagipachi napbolaha. Jagittamni ja-mano iamang sakgni bia ka-aha. Uamangni bia ka-ani salara, gnigipa changna mikkang nikgrikani ong-aha; maina uamangni jatni dakbewalo ma-a-paasa bia ka-aniko *arrange* ka-e on-achim.

Uamangni bia ka·anio uamanga agitalrang ong·oba, Isolan uamangko saksa sakgipinona dilaha ine Sahana aro Aby bebera·aha. Uamang damsan nokdango Isolko *centre* done janggi tangenga. Uamango da·o sakgni degiparang dongaha.

*Aby aro Sahana Kurian Hosur-o, (India), Aby-ara Software Engineer ong·e dongenga.*

---